

Date – 24/07/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoman Assam Rifles chhuahsan ram ah Aizawl Civil Hospital zauh nan Aizawl Police Station dah tum a ni a ti.
2. Larsap Lt General (Rtd.) Vijay Kumar Singh an Mizoram chu ram chhunga Red Cross Model State ni tura tan lakpuiah thalaite a sawm.
3. India leh UK chuan vawiin khan Free Trade Agreement (FTA) an ziak.
4. Union Petroleum and Natural Gas Minister Hardeep Singh Puri chuan rampum energye thianghlama tuam chhuah tawh a ni a ti.

<><><>

CM

Chief Minister Pu Lalduhoman Assam Rifles chhuahsan ram hman dan ngaihtuah tura din Advisory Committee in Aizawl Civil Hospital zauh nan Aizawl Police Station chu Assam Rifles luah thin ramchhunga dah a thuphungin an pawm a ti.

Vawiina Aizawl Civil Hospital Trauma Care Facility thar a hawnnaah he thu hi sawiin Chief Minister chuan Aizawl PS awmna chu hospital in an nei thei dawn a nih chuan a lai zawla parking system te awm zawnga duan a nih tur thu a sawi a ni.

Byte of Chief Minister...

Chief Minister chuan Civil Hospital Block A leh B chu sak that tura engkim tihfel a nih tawh thu a sawi a. PMJVK atangin pawisa cheng 88 leh nuai 33 an hmuh thu sawiin block sak that turah casualty a awm avangin a rang lama sawn a tul dawn a ni a ti a. Civil Hospital, Aizawl Block A leh B chu tuna Aizawl PS awmna lamah te pawh dah a tul zawk maitheih thu a sawi a ni.

Chief Minister chuan sorkarin Aizawl Civil Hospital tihchangtlun tuma hma a lak nasat thu sawiin lung zai, kal thlak, IVF tih leh sum tam tak senga phai pan thinna thenkhat chu Civil Hospital-ah dah an tum tih a sawi a. Doctor te thiamna chuan tlin mahse hmanrua a awm lo tih sawiin a tuartu mipuite an nih avangin hmana tih theih loh chu tunah tih theih tum a ni a ti.

Vawiin khan Assam Rifle ram chhuahsan hman zui dan tur ngaihtuahtu Advisory Committee te chu an Chairman Chief Minister Pu Lalduhomahovin an thukhawm a.

Meetingah hian Mizoram Synod atanga lehkha hmuh te, AR ram chhunga mimal ram nei court thubuaia lut mek chungchang te, AMC, GPC Mizoram State Assembly, Health, P&E leh PHE Department atanga dilna lo lutte an pharh a.

Aizawl Civil Hospital Complex tihzauh nana Aizawl Police Station awmna hi hman a nih theih nan AR ram chhuahsanah hian Aizawl Police Station hi dah ni se tia Health Department dilna chu a thuphunga pawm a ni a, zirchianna neih zui tur a ni.

PHE lamin tui dahkhawlna, hmun pathuma siam an dilna pawh, an siam dan tur design te hriatsak hmasak ni se an ti bawk.

Committee hian chhuahlam pangah kawngpui sial thain a hria a. PWD lamin an lo enfiah ang a, mimal leh pawl hmunhma a khawih theihthe zirchian a ni bawk ang.

He hunah hian UD & PA Secy Pu Lalmalsawma Pachuau chuan AR ram chhuahsan hman dan tur Master Plan chu Culture & Nature Centre, khawvel khawpui changkang danga an lo neih thin ang ngaihtuah ran chung a an duan a nih thu a tarlang a. A ram zawng zawng zatve aia tam zaa 52.57 chu hmun hring, mipuite tana len khaw thawn theihna turin an ruahman a ti.

<><><>

POL SHORTAGE

Mizoram khawpui Aizawlah ni 3 kalta chhung khan tuialhthei harsatna avangin lirthei tlanchhuak a tlem a,

The Mizoram Oil Tanker Driver’s Association (MOTDA) chuan Aizawl-Silchar kawngpui chu tlan ngaihna awmlo khawpa chhia a nih tawh avangin an tan tlan ngaihna a awmlo tiin an lirthei te ni 19 atang khan an dintir a, hemi hnu hian Aizawla petrol leh diesel hralhchhuahna hmunah te tuialhthei hralh an khuahkhirh nghal a ni.

He harsatna thleng avang hian sorkar chuan cheng nuai 100 sengin kawngchhe lai thawm that anih tur thu a sawi a, kawng siam mawhphurtu NHIDCL executive director thlak a ni bawk a, hemi avangte hian kawngpui siamthat hna hi thawh tan a ni.

Kawngpui siamtha tura na taka nawrtu pawl Joint Civil Society of Mizoram (JCM) Secretary Dr. Vanlalsiama Chhangte chuan Kawnpui leh Sairang inkar kawng chhia chu siam tan a ni tih vawiina an enfiahnaah an hmu tih a sawi a, hemi avang hian Zoram Hnatlang koh an tum pawh an thulh tih a sawi.

Akashvani News in a kawmnaah Dr. Vanlalsiama Chhangte chuan an phut anga kawng thawm that hna chu thawh a nih thu leh Mizoram PWD leh NHIDCL pawhin hna an lo thawk tih an hmu a ti a, Kawng chu la chhe viau mahse hma la tuten theihtawp chhuahin kawng thawm that hna an thawk tih an hmuh thu a sawi a ni.

<><><>

GOVERNOR

Larsap Lt General (Rtd.) Vijay Kumar Singh an Mizoram chu ram chhunga Red Cross Model State ni tura tan lakpuiah thalaite a sawm.

Vawiin khan Govt. Aizawl North College-a Indian Red Cross Society Mizoram State Branch hmalak bultanna a hawnnaah sawmna hi siamin, thalaite chu Mizoram mai bakah India ram hmalam hun atana beiseina meichher kengtu an ni a, Mizoram zirna in hrang hrangte chu Youth Red Cross Unit din theuh tur leh member-te zirtirna tha tak pek vek tum turin a chah a ni.

Byte of Governor...

Larsap chuan Indian Red Cross Society Mizoram State Branch hmalakna bultan a ni chu lawmawm a tih thu sawiin Mizoram chu India rama khawtlang inlungual leh inpumkhat tia hriat hlawh a nih thu leh Mizote nunphungah ngilneihna, inpekna leh tlawmngaihnate'n thuk takin hmun a chan thu a sawi a. Mizote chuan thenawm khawveng inngaihsak tawn leh mamawh huna hnai reng thin khawtlang nei mahse, khawvel hriat hlawh leh awmze nei taka pawl kalpui, Indian Red Cross Society a neih belh thei chu a hluin hmasawna a pek belhchhah dawn a ni, a ti.



ELECTROCUTION

Serchhip-a hmun hniha thilthlengah electric man avangin mi 2 an thi.

Vawiin chawhma dar 10 vel khan Pu T.Lallianghaka kum 41 Khawlailung khua chu Airtel tower ah wifi connection signal an buaipui laiin, electric current man vang nia hriatin a thi a. Pu Lallianghaka hi leihlawn a lawna hna thawh a tum laiin a thawhpui pahnih hmuh loh laiin a nikhaw hre lova awmin a thi a, electric man vang nia hriat a ni.

Vawiin vek chawhnu lam dar 3:30 vel khan Serchhip Bazar kawna mimal building sak thar dawr atana siam mek, electric wiring hnathawk Pu Zohruailiana kum 48 vel New Serchhip north a mi pawh electric in manin, Serchhip Damdawi in thlenpui thuai a ni chungin, a thi a ni. Amah hi New Serchhip north YMA vice president a ni. Vanduaina tawka te pahnih hi zaninah lumen an ni ang a, naktukah vui a ni ang.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



INDIA-UK FTA

India leh UK chuan vawiin khan Free Trade Agreement (FTA) an
ziak. Vawiina UK PM Keir Starmer nen thuchhuah intawm an siamah
PM Narendra Modia te chuan India leh UK chanchina hun
chhinchhiahtlak tak anih thu a sawi a. Kum tam tak rim taka thawh anih
hnuah Comprehensive Economic and Trade Agreement chu ram pahnih
ten an siamfel ta tih a sawi.He inremna hian ram pahnih hausakna tur
kawng a sial dawn a ti a. India siam puanthan, pheikhawk, lungflu leh
tlereuh, seafood leh engineer bungrua ten UK ah hralhna tha an hmuh
theih phah dawn tih a sawi a. Indiaa eitur sawngbawlina lama
sumdawngten UK ah sumdawnna thar an hmu thei dawn a ti a. India
thalai, loneitu, sanghamantute leh MSME sector lama thawkte tan
hlawkna a thlen ang a ti bawk.

<><><>

UNION P &NG MINISTER

Union Petroleum and Natural Gas Minister Hardeep Singh Puri
chuan rampum energy thianghlina tuam chhuah tawh a ni a ti. Vawiina
Lok Sabhaa zawhna chhangin Pu Puri chuan sawrkarin energy
thianghlim hmang uar turin nasa taka tan a lak thu sawiin CNG leh PNG
te uar taka hman a ni a ti a. Kum 2024 a PNG connection nuai 25 ni thin
chu tunah chuan vaibelchhe 1.5 a tling tawh tih a sawi a ni.

<><><>

PARLIAMENT

Vawiina Parliament rorel inkhawm chu Opposition te au
bengchhen avangin rorel thei lovin vawiin atan tihtawp a ni. Lok Sabha
ah chuan chawhma dar 11 a rorel tan anih rualin oppostion ten
bengchheng an siam nasa hle a. Speaker in chawhnu dar 2 thleng rorel
inkhawm a titawp a. Chawhnu inkhawm an luhkhawm hnuah pawh rorel
theia an awm loh avangin vawiin atan tihtawp a ni ta a ni.

Rajya Sabha ah pawh hun rei lo te rorel inkhawm kalpui a ni
a.Hemi chhung hian Deputy Chairman Harivansh chuan nominated
member thar Ujjawal Nikam chu rinawmna thu tiamtirin member thar
atan a lalut a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11
hian 'Mann Ki Baat' programme-ah ram chhung leh ram pawn mipuite
hnenah thu a sawi leh dawn a, Tun tum ami hi a tum 123-na tur a ni
ang.

He programme hi Akashvani leh Doordarshan network pumpui,
AIR News website leh Newsonair mobile app-ah te tihchhuah a ni ang a,
AIR News, DD News, PMO, leh Information and Broadcasting
Ministry-a YouTube channel-ah live-stream a ni bawk ang.

<><><>